

四庫全書

集部

欽定四庫全書

集部

野古集

年譜
卷上

詳校官國子監司業臣納麟寶

中書臣劉源溥覆勘

總校官編修臣王燕緒

校對官學正臣翁樹棠

謄錄監生臣文彩煇

欽定四庫全書

集部六

野古集

別集類五
明

提要

臣等謹案野古集三卷明龔詡撰詡字大章

崑山人父登洪武中官給事中以言事遣戍

五開衛詡遂隸軍籍後調守金川門燕王篡

位詡變姓名遁歸賣藥授徒以自給正統己

未巡撫周忱薦為松江學官不就又薦為太

倉學官亦不就嘗語都御史吳訥曰詗仕無
害于義但恐負當日城門一慟耳成化己丑
始卒年八十八明史附載牛景先傳是集乃
崇禎乙亥其八世從孫挺所刻前有李繼貞
序稱刪其十之二三蓋詗詩格調在長慶集
擊壤集間其傷于鄙俚淺率者繼貞稍汰之
也要其性情深摯直抒胸臆律以選聲配色
彫章琢句誠不能與文士爭工律以綱常名

教之旨則不合于風人者尠矣末附上周忱
書及王執禮張大復等所作家傳墓誌諡議
像贊等篇又有年譜稱詔族姪綏所編于建
文四年稱傳言乘輿遜去于正統七年稱舊
君還京先生作落葉吟見意按綏之作譜在
成化十三年楊應能事應久已論定不應有
舊君還京之語且落葉一詩本無明指安知
非別有託諷而顧據此斷為惠帝出奔還京

之作亦未見其然此譜于康熙乙巳挺得本
于其族弟維則故崇禎乙亥原刻總目不與
墓銘家傳等並列觀是一條其真為赝作與
否猶在兩可間也疑以傳疑姑並存之而已
乾隆四十六年十月恭校上

總纂官臣紀昀臣陸錫熊臣孫士毅

總校官臣陸費墀

野古集序

世之罵疎俗粗鄙者類曰野而目方直廉介者類曰古
余生草野間所交與者黃童白叟而已是故蹤蹟罕涉
乎勢利之途談論不越乎耕牧之事衣冠不隨乎時禮
貌不徇乎俗與夫一言一動舉不諧人耳悅人目而適
人意也或者以野罵之或者以古目之余聞而竊自揣
焉罵我野者誠得我實不足深過而目我古者虛譽過
情非余所敢知也於是兼取二字以命其齋庶為晨夕

接目警心之助以求去其野而馴致其古已耳然余平生好吟所成就僅百餘篇其鄙俚迂誕直所謂吳歛巴唱也他日不恥貽騷壇作家之笑錄以成編因齋名而題之曰野古集區區之心非敢以自擬也傳有之曰詩言志余之命意措辭之拙固懸絕於古人而野人拳拳之意或可少見矣天順癸未八月中秋日逸老龔詡大章自序

野古集年譜

青縣教諭龔紱撰

鈍菴素履潔白至性忠孝以高年壽終雖誌傳班班可攷而循年紀事之譜尚爾缺然紱幼辱化誨長荷薰陶親承遺教其容不文已乎乃稽其行事纂其言之發於忠孝者附之歲年之下述譜如左

洪武十五年壬戌

是歲十月十一日生先生於岳州考諱譽字叔言蘇之崑山人於洪武十一年戊午中文學科選授岳州

儒學正母王氏宋參知政事王絢裔孫諱慶恂之孫
女生先生時年三十三歲

洪武十六年癸亥

先生時年二歲家於岳州會陞州為府州官偕入京
改調岳守見上問以民風土俗懾不敢言而叔言奏
對詳悉上謂其有敢言之風遂遷兵科給事中乃家
於京果良於獻替尋轉都給事兵科

洪武十七年甲子

先生時年三歲春三月叔言以言事獲罪謫戍五開
衛胥靡以行母王氏與子女先逮至湖廣會赦得還
鄉里與叔言會於塗相號泣以別獨攜幼子女三人
東歸道喪其二所存惟先生一人時國禁方嚴戍者
不得與親屬偕叔言至五開不久而卒遂葬其所

洪武二十年丁卯

先生時年六歲與母氏居二保從塾師沈以中遊學
性通敏過目成誦讀書即求悟解一日師出外羣弟

子輒為迷藏戲而先生獨凝然莊坐畧不寓目其韻
異如此

洪武二十四年辛未

先生時年十歲遷居邑之春和里從西齋林先生遊
通春秋經義每讀書至夜分必呱呱泣母覺發曰汝
何泣先生曰人皆有天倫之樂而我獨無人享寧居
而我旦暮有仳離之苦是以泣耳於是母亦為之泣
是時五開以叔言物故勾補伍者無虛日先祖奉政

公與其從兄瑀閔其寡弱陰賄用事得緩其行

洪武二十八年乙亥

先生時年一十四歲會勾補伍者益急乃去補戍遠
陽充五開衛卒屬築城先生當運磚見主者憤於所
事乃疏其方畧挾書從事主者異而禮之

洪武三十一年戊寅

先生時年一十七歲北方有事兵亂戍卒皆亡先生
亦亡冬十月詣闕請補近衛以衛王宮上嘉其義撥

歷城侯盛庸部下調用

一云此建文二年庚辰冬間事

建文三年辛巳

先生時年二十歲從征淮陰後敗績亡歸守衛王宮

建文四年壬午

先生時年二十一歲守金川門六月十三日乙丑成
祖靖難兵至金川門谷王穗以門降先生操戈相向
再擣之不中亡之郊外見宮中火起傳言乘輿翼去
即投戈大慟歸鄉里變姓名為王氏竄伏江陰海虞

之間

永樂四年丙戌

先生時年二十五歲授徒於言城周敬修氏有寄聽
泉沈兄孟舟曰君比參星我比商相思縮地恨無方
十年湖海同漂泊兩地情懷一感傷會面未知何歲
月論心安得共盃觴幾迴雲樹窮吟目千里悠悠思
更長

永樂五年丁亥

先生時年二十六歲題枯枝凍雀圖有曰歲寒風雪
滿山林獨戀枯枝思不禁愁絕紆干興感處不知臣
子獨何心

永樂六年戊子

先生時年二十七歲寓居常熟馬字昌氏母王氏獨
居崑山有客中思親詩其一曰才看黃落梧桐葉又
見青歸柳上枝慈母鬢毛紛似雪小兒方寸亂如絲
其二曰烏母含飢守故巢烏兒折翅墮林皋相呼相

應空相憶夜冷霜清月正高

永樂十年壬辰

先生時年三十一歲夜歸古婁逢陸漁隱話舊曰十
年湖海共飄零無異紛紛水上萍今日客中欣邂逅
故人情重眼猶青其過東易遺老故居有曰仙客騎
鯨去不回墨池吟事久塵埃我來再拜庭前樹為憶
先生手自栽遺老沈姓以中其字先生童子時師也
至是淹忽已久身後寂寞悽然感悼不覺涕零為詩

以誌之

永樂十二年甲午

先生時年三十三歲避居琴水上時母氏年六十五
歲獨居崑山適吳文恪公訥自海虞來教崑庠送以
詩曰嗜讀先生舊典謨十年窓下自伊唔恥隨兒輩
營青紫樂與英材作範模朝醉言城江上酒暮餐崑
學園中蔬送君不得隨君去垂淚空憐返哺烏後文恪
以事止不果行

永樂十五年丁酉

先生時年三十六歲與友人袁宗魯別幾二十載十月望日一旦邂逅琴川寓舍追論疇昔不勝慨嘆既而寄懷有曰竄伏江鄉二十年艱難生計總無便童汪非怯當年事為有慈親在故園其寄友人有曰音書何處覓鱗鴻二十年來杳不通槽檻有誰憐老驥江湖無不羨元龍皋魚風木君心苦仁傑雲山我興濃欲問相逢定何日只今萍梗正西東

永樂十七年己亥

先生時年三十八歲其述懷有曰自嘆微軀一羽輕
去留無定似遊僧病隨春草年年長愁逐秋潮夜夜
增定省久違思老母心胸日塞念良朋何時得泛歸
吳棹重讀父書親夜燈

永樂十八年庚午

先生時年三十九歲客居涓水之上寫其隱事有鐵
心行云我有胸中一塊鐵贈君煅煉成寶刀不斬狐

狸及鼯鼠要斬南山白額長橋蛟視蛟如蚓虎如猫
心不為動力不勞功成畢竟藏諸韜肯將割肉供君
庖縱教埋沒不復用終使神光夜燭斗牛高

永樂二十年壬寅

先生時年四十一歲詠採薇以自况有曰周家之粟
苦如蘩首陽之薇甘若飴弟兄風節有如此千古此
情誰許知靖節東籬醉黃菊四皓商山採紫芝孰云
世代有先後彼此未必殊襟期君不見太朴日散趨

澆漓流風餘韻無復遺世人但識癡頑老若見此圖
應解頤

永樂二十二年甲辰

先生時年四十三歲客居琴川娶周氏素慎為妾

洪熙元年乙巳

先生時年四十四歲仁宗即位詔諭羣臣解建文被罪
臣禁寬恤軍政秋八月同季仲怡荒往玉峰夜宿新
塘阻風雨客有吟唐人縱然一夜風吹去只在蘆花

淺水邊之句步其韻有曰一帆同載孝廉船夜泊新
塘聽雨眠為動故園桑梓念不知清淚落腮邊仲怡
亦和之曰楊柳磯頭繫客船打篷風雨夜驚眠西風
不管情懷惡又送濤聲到枕邊

宣德二年丁未

先生時年四十六歲館琴川陳南野氏有客中思親
詩曰憶昔離家三十秋轉眼少年成白頭一身湖海
尚萍梗每愁不肖貽親憂遙憐朝暮依門處不見兒

歸應淚流淚流有時乾
思念無時休無時休常抱怨
兒非不思歸自是無歸便
太行回首見孤雲千古懷
英共悲應舉頭問天天不言
何時得遂平生願奈此
日月何匆匆急如箭
北堂日夜切歸心
杜宇無勞苦
相勸

宣德四年己酉

先生時年四十九歲
母王孺人年八十一歲
有哀親年邁曰
一生子職苦蹉跎
深愍慈親八十過
若論兒

心思罔極再加八十未為多友人李仲怡以慈烏返
哺圖求題援筆曰主人庭樹綠森森返哺時來慰母
心顧我北堂違菽水負恩深痛不如禽冬十月有詔
恩清理戎籍其老弱不堪遠配者悉附近衛差操久
捕不至者出首著伍免罪是歲都御史周忱撫吳

宣德六年辛亥

先生時年五十歲春三月都御史周忱均田額躬行
畝畝夙知先生賢至是徧物色之得之於琴水上親

造其廬問以當世事宜手條二十餘事上之忱以語
久無供具隨行請食食以草菜而退忱以所陳事次
第推行吳民至今便之

宣德七年壬子

先生時年五十一歲自靖難以來軍政督急促補五
開缺伍縣受文牒至四百七十至是有司奉詔例清
理軍伍乃遂以先生為老弱無嗣近附鎮海戎籍有
歸婁江詩昔年曾住婁江上看到園林幾樹春今日

歸來風景異梅花猶識舊時人
其一廿載江湖逐梗萍
故園花木總凋零歸來獨有窓前竹不減猗猗舊日

青
其二

宣德八年癸丑

先生時年五十二歲後四月初七日母王孺人卒先
生哀毀踰禮幾至滅性其病後有詩曰一病纔甦似
酒醒却思遺體忽心驚幸生不必論諸事得寐何須
問幾更已覺壯心隨日減久拚華髮滿頭生痛憐念

母恩無極淚雨何時可得晴

宣德九年甲寅

先生時年五十三歲友人康友竹為寫畫像其自題
有曰十年不見康友竹一日客裏驚相逢江湖落魄
總相似生意不殊心事同為施丹青造化筆寫我山
林枯槁容鐵冠布衲草為履抱琴瘦僕行相從寒風
兩鬢吹蓬鬆雪中古木霜中鴻風流敢託歸來翁一
團清氣蟠心胸功名不羨褒鄂公莞爾一笑浮雲空

今年五十已過二六十相將在眼中君今還西我歸
東一聚一散真萍蓬他時何處可得復相遇為我添
箇尋詩筇

宣德十年乙卯

先生時年五十四歲其歸田園有曰客中常憶鄉關
好每恨歸來苦不早十年世事付春夢數畝田園沒
秋草今朝始得返吾廬玄髮驚看半成縞痛憐慈母
卧泉關灑淚含悽向誰道老妻沽酒慰睽離弱息呼

翁覓提抱胸中感慨幾多情一夜燈前盡傾倒十月
娶淑新周氏有買妾詞冗不載

正統元年丙辰

先生時年五十五歲自丁未以來猶客寓海虞陳氏
至是東歸別諸友有曰一別故園三十秋此生漂寄
似萍浮奔馳自念多身累憔悴誰憐久客愁舉世但
知新締好維君不忘舊從遊相思後夜知何處明月
清風隔古婁歸而與族姪彥中話舊有曰廿年逃難

海東陬往事重思淚欲流最是夜深何處笛為予吹
徹許多愁一其備歷艱危十載前此身常與死相連誰
知痛定重思痛毛骨於今尚凜然其二

正統二年丁巳

先生時年五十六歲春築室於邑之北郊虞浦上藝
卉木蔬果題所居曰野古齋日與伯父珩季父瑀咏
歌其中有田三十畝力耕自給而於聲利紛華泊如
也其相依彥文理諱昆弟以居有曰早歲飄蓬晚得歸

念叨同族遠相依難兄難弟心無二全孝全忠志不
違既遇仲淹終見卹不慙伯玉老知非一菴已副棲
遲計聊托耕耘代蕨薇秋八月二十四日偶憶前事
言之痛心有口號曰三十年前萬歲橋村莊投宿記
今宵當時老嫗知安在淚灑西風百里遙先生自注
曰彼時余寓其家有老嫗甚有憐恤我意待之過厚
其萬歲橋界於常熟無錫江陰三縣之交時壬午秋
日也

正統三年戊午

先生時年五十七歲海虞郭令聞先生賢常不遠百里來訪之秋七月遺以梁肉親過野古齋談論竟日而去有謝郭公令詩

正統四年己未

先生時年五十八歲巡撫周文襄公忱欽其才節兩薦之為淞江太倉學官不就以書辭之其畧曰詡性愚識淺德薄才涼加以寡弱一身愁苦亂其方寸不

忠不孝誠天地一罪人耳今也年幾六十旦夕之人一死之外無他顧也乃者執事謬以千慮一得之見謂可以居民上便欲置詡於後生模範之地則豈其所願欲者哉若今致仕都憲海虞思菴吳公稔知不肖之為人試以質之必將得詡之實矣夫庠序乃名教之地以詡處之則名教何在是以寧死敢咈執事愛厚之意決不敢須臾離此以貽名教之羞古語曰君子愛人以德不強人以所不能倘或不棄則向之

所言或一一行之則執事之賜不既厚矣乎忱訪訥

思菴名 訥以恐負城門一慟之語告之忱乃止秋八月

淫雨浹旬作苦楚吟以遺當道民有發粟之惠

思菴嘗謂

先生曰以子之才何不仕先生曰謝
任無害於義恐負往日城門一慟耳

正統七年壬戌

先生時年六十一歲舊君還京有落葉吟寓意曰落

葉復落葉堦前積漸多雖知無返期未能忘舊柯誰

知舊柯心已萌新葉意新故情不同能不我遐棄作

書報新業且莫誇逢時西風一朝起此情當自知

正統八年癸亥

先生時年六十二歲水潦彌日著癸亥民情詩

正統十年乙丑

先生時年六十四歲妾周氏淑新於宣德十年來歸
賴其奉事之力者十霜是歲十月八日卒距其生永
樂癸巳四月三日得年三十有三其哀淑新詩曰東
風拂拂從東來名園草木俱花開花開豈無數日好

爭柰晚來風雨催半隨流水半塵土舊枝一別無時
迴人生處世亦如此對之能不令心哀可憐吾家歲
寒婦十載衡門共母苦昨朝猶見奉衰翁今日誰知
卧黃土綠雲一斷杳無蹤愈遠思之愈悽楚一宵耿
耿不成眠數盡譙樓五更鼓

正統十一年丙寅

先生時年六十五歲春三月十七葬淑新於所居之
側其詞曰噫惟汝家於烏目之西兮其氏為周方九

齡而義養於陸兮又十四而歸我於婁時余齒居百
之半而又四兮紛白雪其盈頭汝能弗以枯楊之莢
而芥蒂兮安命分而曾無怨尤痛吾抑而癢吾搔兮
饑我食而寒我裘以余後之寂寥兮畜幼息而誓以
守吾松楸嗟日居而月諸兮瞬息頃而十越春秋柰
天命之不與兮志雖銳而莫酬遭余時之不料兮抱
疾疢而幾乎一周孰謂汝之感而廢其寢食兮竟伏
枕而弗廖雖顛沛而心弗為之亂兮所云云者無非

善後之謀感吾生之既邁兮方仗汝以遂其優游胡
為棄我而逝兮忍不能為數載之留豈吾不德而致
汝於斯兮折而壽之不脩彼里閭之知與不知兮誰
不為之涕流矧余感汝義誠切兮痛曷時而可休瞻
鹿城之故原兮為吾母之樂邱汝其從吾室而後先
兮侍吾母而仙遊惟汝事之既畢兮我亦免夫身後
之憂苟素行無愧而可樂兮夫何間乎明幽俟予命
盡而為九泉之歸兮會一笑而相求長歌之悲過於

慟哭兮我恨悠悠嗚呼淑新兮其知此否嗚呼淑新
兮其知此否歌已遂刻於石以志其壙云

正統十二年丁卯

先生時年六十六歲友人史君實畫採薇圖遺之題
其上曰採薇千古說夷齊風味還同我甕壘珍重故
人知此意遠緘詩畫慰窮棲義孫周寶生

正統十四年己巳

先生時年六十八歲憶朱輔有曰家山杳杳同千里

行李蕭蕭各一身憶昔相逢淳化鎮異鄉人念異鄉人其自註曰輔安慶人常客吳與余善前壬午秋相遇於淳化鎮於今幾四十載矣追憶其事不覺泣然

景泰元年庚午

先生時年六十九歲其自題曰余每咏昔所歌金陵妓雖老不覺墮淚惟沈誠學張文翔可以語此意也哀哉其詞曰佳人二八婉清揚客寄金陵歲月長邂逅東吳舊親識慙慙一一問家鄉其一石頭城下水滌

迴曾為郎君把一杯今日偶從船裏過含情不覺首

頻回其

二

景泰二年辛未

先生時年七十歲自題其居曰居臨流水縈紆門對
青山突兀四時風月雲烟總是吾家舊物但知安分
休休不作書空咄咄且喜盈樽有酒何羨滿床堆笏
君不見朝來簷日暖融融笑看梅花坐捫虱

景泰三年壬申

先生時年七十一歲有趙縉者以御史按吳虐民間
上歌風犬行以刺之其略曰白日都無憲主心黑夜
絕無防盜意必當為人擊死棄中流惟蓋終無可埋
地

景泰四年癸酉

先生時年七十二歲老妾周氏素慎事先生久除夕
以詩贈之曰汝今事我三十年昔為少壯今皤然東
西南北幾遷變勞苦飢寒深可憐深可憐念之能不

心煩悵自知命分已前定肯學吹茄輕怨天昨發一
言堪賞歎勸我無勞思後患但令歡笑樂餘年管取
緝麻賣錢供爾魚羹飯魚羹飯不媿梁家孟光案適
然義孫周寶拍手起舞為我歌青天阿翁大笑不覺
七十三年又在今宵五更換

景泰五年甲戌

先生時年七十三歲是歲大潦吳中大饑有民風詩
略曰一經水旱便流離風景蕭條思慘悽到處喚春

空有鳥連村報曉寂無雞顏垣棄井荒蕪宅苦調哀
音凍餓妻更有社公同寂寞年來不復享豚蹄又鍋
無粒粟竈無薪只有松楸可濟貧半賣半燒俱伐盡
可憐流毒到亡人葉文莊公盛稱其碩德與學巍然
鄉邦之重所為詩有杜荀鶴時世行風致與流俗輩
所為空言無補之音不同者即此也時崑山令鄭達
敬賢士徃徃與其簿造先生之廬而問以救荒之策
有詩以紀之曰承恩降自九重天困苦崑民幸保全

一念遠追前哲美同心尤藉簿公賢惠加寒素聲名
重榮及蒿萊景色鮮慚媿草廬無供奉惟憑一縷博

山烟

景泰六年乙亥

先生時年七十四歲春過幹山弔鐵崖先生墓有詩
曰松江西來澗湖洑九峰歷歷皆相似中有一峯高
入雲鐵崖先生卧於此先生學正天才高經濟文章
重三史吳會依歸足俊才竊比關西號夫子方當元

社將屋時羣雄在處蟠蛟螭英材無不被籠絡節義
未免為文姬惟有先生不受羈放情歌酒隨游嬉拘
拘士輩笑狂蕩明哲保身元不知君不見惓惓狀頭
書李黼可念良工心獨苦無言混俗儼陶潛有仲即
憐期蔣詡柳娘牢護守宮紅秋娘未負揚州杜我來
尚感百年心再拜荒原一抔土與彥中子姪夜話有
曰偶與諸郎說素心燈殘始覺到更深欲將舊事重
提起怕惹哀情轉不禁壯志有懷徒感慨老身多病

但呻吟宗風振作歸而輩勉力休令負寸陰

景泰七年丙子

先生時年七十五歲夏四月十六義孫周寶病腫死
哭之曰義孫十歲頗聰明日夜惓惓望有成豈意永
辭從學路那知頓絕讀書聲我生稟得殊孤獨爾命
由來也薄輕石上三生如果有公孫願得叙餘情夏
秋大旱作丙子民情觀風者採焉

天順元年丁丑

先生時年七十六歲自題小虞浦草菴有曰我家玉
山下正壓虞溪隈門可羅鳥雀徑惟周蘚苔媿無濟
時策高位讓羣材安貧復守賤分外奚求哉甕頭白
酒熟籬下黃花開為招陶淵明共歌歸去來

天順二年戊寅

先生時年七十七歲縣令鄭達卒於官先生以詩挽
之曰不知有己能忘勢破屋時勞肯見過疊疊笑談
霏玉屑雍雍惹怒藹陽和無能野老蒙知久失所窮

民感惠多千里湘潭歸櫬遠痛為吾道泪滂沱

天順四年庚辰

先生時年七十九歲四月十三葬義孫周寶於崑城
祖墓之旁乃為詩以銘之曰生既隨公公死亦隨公
公生死不相離情深江海同爾今寧爾居為我守空
榔待得公公數盡來與爾復叙舊歡樂富貴壽不為
厚貧賤天不為薄何必羨人間萬戶侯何必慕遠東
千歲鶴噫煉鐵本鑄劍鑄就却成錯兩眼望爾爾不

歸一日幾回清泪落義孫者為先生義養進安所生
實方二歲而進安死先生育之如子迨能舞象即聰
慧絕人教以書史經義過目輒成誦且能領會意旨
深器異之竟以病死僅十歲其生為正統丁卯三月
之八日也

天順五年辛巳

先生時年八十歲精爽不衰如壯夫之飲食所適無
遠近必步或勸稍就舟楫曰天生我足何用哉每夜

讀書至二鼓燈下看細字不少瞬而五經子史能全
卷背誦如水注尤善記國初典故至於文移案牘皆
能腹笥之不遺且周知百物之名然孜孜好善言必
忠信孝友以教後進子弟後進子弟之嗜學力行者
咸之先生之門而取則焉冬十月十有一日為八十
誕辰畫史張文著為祝壽圖鎮海指揮使彭城武政
倡羣賢為詩其上誠學沈魯叙其略曰夫仁者壽固
無異議而得壽之由或異可無言乎或謂先生幼歷

艱虞勵苦志善醫藥而不飲酒節食慎疾所以致遐
齡如此之健是殆見其粗而未見其末耶先生早居
戎伍躬執戈矛以為童汪之役身雖弱而功則可紀
其為宣尼之所避者蓋亦有自矣况年與德進學有
日新其為詩也寓少陵之史筆其為文也繼賈傅之
經世而風教名節又拳拳不忘於言則與輕浮詭浪
之嘲咏風月而不惜廉隅得喪者其為朝菌與莊椿
又安知小年大年之相遠奚啻若是耶

天順六年壬申

先生時年八十一歲其書懷有曰少壯方當弱冠年
曾揮血泪玉階前而今省着當年事不覺長號向老
天其一阿婆蓬鬢白如銀八十年來未嫁人說與旁人
都不信至今猶是女兒身其二

天順七年癸未

先生時年八十二歲清明日偕八九伴弔御史李樂
菴劉龍洲易蓮峰陳信卿諸無嗣之墓其謝同遊有

曰少罹多難可悲憐漂寄如萍六十年不道歸來頭
雪白又隨親友弔前賢夏五月作壽藏於鹿城祖塋
之昭同邑沈魯記之其畧曰先生少籍戎伍身歷多
艱年逾八十而好古之心彌篤忠貞孝義之談日不
虛口後生小子獲聞先生之謦欬莫不悚然佩服以
警策於終身盖亦古之遺老能引後進以遵道者世
豈多見其人哉李唐司空員外生壙中歲時集客嘗
曰吾豈須臾處此耶既卒承家之嗣而外孫為之世

守今先生亦然先生於司空氏顯晦不同而志操則一後之人有觀九原而追慕高風若趙孟叔孫之武子文仲為歸者會當有能記諸牘簡於是同邑縉紳士錢昌談懋周珙顧鑄朱泰安夏昺唐益馬成孫瓊陳錦葉盛武政張翔駱弢陳翊周滙相與咏歌成卷外孫周雍與紱繪圖於前最後進士鄭文康陳德容跋其尾

天順八年甲申

先生時年八十三歲自題其居為逸老菴沈魯記曰
鈍菴先生早罹世故遯跡於窮途涸轍者五十餘年
而後歸老桑梓築室虞浦之濱題曰逸老俾余記之
余以先生年逾八秩身歷多艱始憂己之不能一朝
居其室終憂民之不能一日遂其生僅留餘息于續
之未屬而猶汲汲皇皇日不暇給奚其老之能逸乎
先生憮然嘆曰子未知余哉昔余先人以直道不詘
淪沒羈旅吾欲執鞭從之而不可得垂髫隸戎伍補

黑衣之缺以衛王宮方事之殷而遽焉倒戈束手徒
涕泣而不能為之致命犬馬識其故主念之悲不能
已如昨日嗚呼傷哉痛也其如吾情何日來衰老逾
甚恒恐意荒而無益於事惟綴葺文字整頓名物切
於日用者衆以為遠急於有生者人莫之行吾則舉
而告之不厭其瀆而俾有為者得以盡其力不肖者
亦知所自勉庶幾伐檀之詩無媿乎不力而食所謂
畏天命悲人窮者則吾未敢自處也是以人跡吾行

以為紛然煩擾而吾質吾中則所存者未易形言生
得遂吾性死不失乎正終身服役奔走之不自恤而
宴然安處於晚節末路有餘裕者庶幾真趣之可適
吾何為而不能自逸哉昔者蔡中郎之留心漢典趙
太僕之溫故軻書二子卒老於行猶不免於當世吾
則聲利不入於耳榮辱不驚於心以終吾餘日其為
逸又何如耶余作而言曰先生之逸其亦大異乎人
之逸魯連之高元亮之節究其歸初不異矣而蔡趙

豈能望其廬而闖其戶哉末予小子稔聞先生之言而得其志之所在遂述其槩記諸逸老菴之壁

成化元年乙酉

先生時年八十四歲夏大水郡別駕邢姓者以民瘼相諮為苦雨謠以貽之曰今日雷明日雷雷聲未絕雨即隨三月初旬作雨始六月終旬猶未止田中水增五尺高南風吹作如山濤更兼海潮挾湖水衝盡岸塍無可抵嘉禾萬頃爛根苗百姓寸心如火燒晝

夜踏車敢辭苦不憂播破牛皮鼓天公倘有哀憐心
陽春早賜驅羣陰不然我民必當死天公惻隱何安
此我今粗述民間風願達仁明太守公有時肯布萬
全策我民感激情何窮我民感激情何窮

成化三年丁亥

先生時年八十六歲其有感曰羣峰疊疊水滔滔跋
涉都忘舊日勞惟有不平常記得時因感觸便長號
又一首虛名浮利總無求安分隨宜樂四休更覺近

來疎懶甚日高三丈未梳頭

成化四年戊子

先生時年八十七歲自題於壽藏圖卷後曰八十七
年龔逸老鶴髮雞皮就枯槁我將奉我血肉軀瞑目
全歸返洪造諸生為我作壽藏生怕鳶鳥啄我腦藏
既完非草草不儉不豐都道好一朝符到即奉行拂
袖浩然歸去早不須銘不須表無德無功安足道獨
抱惓惓一寸心惟善仁親以為寶眼底浮雲付等閒

屑屑無煩較多少

成化五年己丑

先生時年八十八歲年雖高而聰明不廢矍鑠健步
出入未嘗乘輿馬勞物力一旦小有不安顧左右謂
曰吾將逝矣早跋涉艱危勞苦萬狀瀕九死幸獲全
遺駭於今日復何憾因為詩以別親知其寄親友曰
鬼錄吾知久有名但須符到即時行只慙知己無能
報一一煩公為致聲其寄所親有曰近百衰齡瞬息

過已知枯葉待辭柯只慙未報陽春德暖日和風受
惠多辭世有曰氣短痰深夜不眠語言伸縮總無便
屈腰只欲將扒地仰面何曾怕見天點點黑花生兩
眼紛紛白雪被雙肩一生事業風中燭虛度春秋九
十年正月二十八日癸未正陽整衣端坐口誦大學
首章而逝有白氣起屋極上衝霄漢人以為忠孝所
感先生諱誦字大章別號鈍菴所著有野古集又有
因草事宜大抵關風教道民情好惡惻怛忠厚有少

陵憂恤之心焉是歲閏二月十七日壬申紱與彥中叔父縉紳二弟經理裏事葬先生於鹿城先塋之昭沈魯銘其墓曰早罹世故多危疑中更困伏幾不支雖有利器將安施詩書之樂慰我饑文章節義慰我悲年垂九十志不移嗚呼先生後進師門人私謚曰安節先生以謚議刻之墓道

欽定四庫全書

年譜

欽定四庫全書

野古集卷上

明龔詡撰

五言古詩

送徐氏兄子牧之司訓青田

涼飈動林柯零露淒以白
曰予感哀暮撫景重悽惻
况居憂病中復送遠行客
惟子方妙齡精進有餘力
窮經期致用雲海奮鵬翼
安知時命竒失意主司格分教赴

青田吳越千里隔雖云官卑冷禮數抗侯伯州縣非不
華奔走泚訶責知子素明達榮辱判胸臆一朝別我去
毅然無難色相見知何時雲樹杳南北願遵姬孔教麗
澤競晨夕清風與高節當立萬仞壁尤宜戒垂堂少慰
二親憶枯蒼古名郡文憲富資益幸寄北飛鴻啟我久
茅塞

題賓月軒

悠悠軒中人皎皎天上月良宵忽邂逅敬待雨無褻素

心期共明雅質願同潔但求保終始何暇計圓缺來亦
不須迎去亦不須別淡交有餘情莫與世人說

分金圖為廷悅賦

古人交有道貴義不貴金悠悠千載餘猶見管鮑心洪
水方湯湯羣生困凶歟溝壑同胞人君其幸相念

田家詞

浮雲終日行雨點不曾絕自從秋分來罕得見日月禾
頭半生耳蝗蠶莖梗折一愁官賦急二恐衣食缺哀哉

田野情言之淚流血

南野先生哀輓

彭澤去千載誰念田園蕪卓哉南野翁乃是斯人徒讀
書通大義恥逐章句儒修身事三省惠人期八廚雅性
任真率襟懷恒豁如東臯樹嘉木西疇藝名蔬適意任
所之殺酒隨籃輿兒孫奉賓友歡聲溢庭除每從微醉
時擊節歌唐虞顧我朽腐材不異櫟與樗謬據西齋裊
曾不鄙迂疎星霜二十周始終心不渝睽離幾寒暑雲

樹勞嗟吁復憐身後窮棺衾預為儲如此緒戀情寧與
管鮑殊方圖去茅塞時得親高居德業望規箴優游共
桑榆如何志未遂頓隔幽明途載瞻涓暘原痛切心如
剗臨穴當茲辰忍奠一束芻淚為知己流老眼誰云枯

落葉吟

落葉復落葉堦前漸積多雖知無反期未能忘舊柯誰
知舊柯心已萌新葉意故情雖不同能不我遐棄作書
報新葉且莫誇逢時西風一朝起此情當自知

梅花

風雪方嚴凝乾坤發清氣馨香遠彌佳顏色淡逾貴一
聞鳴玉聲已醞調羹味衆芳當避路讓他出頭地

七言古詩

鐵心行寄沈誠學

我有胸中一塊鐵贈君鍛鍊成寶刀不殺狐狸及鼯鼠
要斬南山白額長橋蛟視蛟如蚓虎如猫心不為功力
不勞功成畢竟藏諸韜肯將割肉供君庖縱教埋沒不

復用終使神光夜燭牛斗高

萊菴先生歌

先生姓周字敬修
芝川人隱君子也

先生雅志樂田野結屋東臯事耕稼不比當年捷徑人
暫託終南待高價不憂丞相嗔不遭官長罵不騎馬旁
人門不低頭出胯下白梅翠竹繞屋栽歲晚吟觀樂清
暇粗衣糲食飽暖休容膝茅茨只三架窓前書卷聖賢
心林下漁樵今古話一出一處聽自然一死一生隨造
化從今寄語郭景純莫為顏含占易卦

觀梅圖

先生雅操如冰玉不愛繁華愛幽獨有足不踏公家門
有口不食非義粟却來山水最奇處賸種梅花搆吟屋
霜林雪逕常獨遊竹杖芒鞋巾一幅疎影暗香詩一聯
千年膾炙無人續鶴骨久仙吟夢寒畫圖尚爾清人目
君不見湧金門外西湖邊花柳富貴人爭傳年年二月
三月天士女嬉游多畫船望中一點青青然為識先生
名更妍

山居讀書圖

先生好遁藏幽谷考槃自樂忘榮辱朝看黃鶴天際飛
暮見白雲簷下宿霜後班班柿葉紅雨過青青書帶綠
螢窓雪案聖賢書不惜勤劬終歲讀每當心領神會處
如見孔顏真面目信知名教有樂地何羨輕裘與粱肉

飢鼠行

燈火乍熄初入更飢鼠出穴啾啾鳴嚙書翻盆復倒甕
使我頻驚不成夢狸奴徒爾誇銜蟬但知飽食終夜眠

痴兒計拙真可笑布被蒙頭學猫叫

續白額行

白額白額猛且雄居然據我林之中白日出林取人食
饒口大開如血紅搖頭掉尾似得意流血滂滂無慘容
遂令自古南山下大道盡日無人縱一朝忽與獵夫遇
密網強弓繞林樹白額計窮無所逃四足如豚縛將去
雖然搖尾乞人憐積惡過深寧汝恕却憐三四假威狐
遁跡潛形在何處

稽山送別圖為陸則明賦

越山青青越水白古來勝景多遺跡離人話別不勝情
徃徃圖之贈行色陸君來此成清遊行直上稽山頭
若耶秦望翫未已興盡忽泛山陰舟盍簪士友遠相送
為寫新圖託規諷惓惓忠孝遠相期此意須知愛君重
君今快著祖生鞭明年應轉東南轅擬沽濁酒候江上
共拚一醉春風前

瘦馬圖

有馬生來異骨骼老病多年伏槽櫃皮肉消盡精神衰
無復長驅騁材力憶昔爾當雄壯時一食或盡粟一石
鞍韉既被不着鞭千里脩途如咫尺安知今日乃如此
欲比駑駘豈能得有時自悼一長鳴奴隸無知謂求食
殘芻敗草隨意與半饑半飽度朝夕哀哉爾馬誠可憐
伯樂無人誰汝惜生時識者既寂寥死骨豈復千金直

老鶴

骨節稜稜冰玉清羽毛翩翩霜雪明不隨神仙去紫府

與我共結林壑盟寧甘饑渴守我分飲啄肯與羣鷄爭
竹間花外每獨步風前月底時一鳴有時向我展翼舞
似欲和我吟詩聲君不見弋媒狗食良可耻衛國乘軒
何足榮願言與爾共卒歲不必雲霄馳遠情

雲鷗歌

白雲閒似白鷗閒鷗在清溪雲在山道人家在溪山間
日與雲鷗相往還雲無期兮鷗不約自信溪山有真樂
好爵未足櫻我情俯仰雲鷗無愧怍雲耶鷗耶不可忘

等閒為爾開壺觴醉來雲散鷗亦去一榻清風夢正長

題畫竹石寄馬字昌沈養明

并叙

二生於余有從游之舊別久不能為情近陳羽伯以
寫竹石見遺因賦此寄之

國風興淇竹易繇云介石我思千載人時能踐其迹武
公之德不可忘周公之辭何孔章乃知在意不在畫無
鹽底須脂粉粧馬生沈生我湜籍頗知好古循規則椎
鑿不斷太古心霜雪寧凋歲寒色別來又見秋風涼相

思之情江水長為書古道用相勉願視竹石同羨牆

自題畫像并送康友竹歸慶安

十年不見康友竹一日客裏驚相逢江湖落魄總相似
生意不殊心事同為施丹青造化筆寫我山林枯槁容
鐵冠布衲草為履抱琴瘦僕行相從寒風兩鬢吹蓬鬆
雪中古木霜中鴻風流敢託歸來翁一團清氣蟠心胸
功名不羨褒鄂公莞爾一笑浮雲空今年五十已過二
六十相將在眼中君今還西我歸東一聚一散真萍蓬

他時何處可得復相遇為我添箇尋詩節

送琴士吳先生南歸

先生瑩瑩真竒士瑩若冰壺貯秋水茫茫宇宙一間身
南北東西任行止平生知己只桐君出入與俱忘汝爾
每逢佳境得幽趣輒發長歌奏清徵南窺禹穴抵吳宮
洗盡少年箏笛耳先生所寶清如此凡塵不受纖毫滓
却視營營世路人一生何殊負塗豕我從南園一見之
笑談如在春風裏金蘭投分即弟兄交親何必生同里

君今別我甬東去湖海後期那可擬倘因雲樹寄相思
會向江頭候雙鯉

題朱舍人畫南軒放鶴軒壁墨竹

郎官歸自絲綸閣醉向高堂寫林薄修篁挺挺石蒼蒼
細雨濛濛烟漠漠坐令咫尺見千里信爾胸中有邱壑
南野老人真好竒舉酒屬客要題詩座中英彥六七輩
文彩照耀光陸離文雄畫妙兩絕作悅目洗心良可樂
吁嗟老我駑鈍姿浪跡江湖久淪落邇來謬據西齋榻

知己歲寒欣有託清風明月幸平分時得吟觀伴孤鶴

懷東莊

我家瀟灑同三徑車馬不聞塵土淨白雲流水互濛回
翠竹蒼松相掩映甕有新醅架有書果蔬自足供盤飮
老妻甘與共清貧勸我不須干趙孟十年作客南野堂
麋鹿未忘山野性惓惓雖荷故人情食粟每羞才不稱
西風昨夜動林柯浩然忽起歸來興殷勤為我報東君
好着梅花待吟咏

謝孔昭畫山居圖為存誠賦

大山峩峩氣凌衆，小山拱揖如賓從。
流泉一派入溪遙，古木千章含雨重。
碩人自愛考槃樂，風光不減元公洞。
盤中苜蓿長闌干，松葉釀成香滿甕。
詩書萬卷聖賢心，一生自足供我用。
世間名利等韁鎖，豈肯垂頭受羈鞅。
不到城中知幾年，推松尚憶移根種。
憐渠世路苦奔馳，得失總成蕉鹿夢。
我生雖久在樊籠，每向江湖羨鱗縱。
明當拂袖賦歸來，風月烟霞幸分共。

觀泉圖

蒼壁倚空如削鐵一帶寒泉噴飛雪只疑天上漏銀河
萬古千秋流不竭若有人兮清且狂平生泉石存膏肓
科頭箕踞翫不已塵慮一洗無毫芒老我飄蕭同野鶴
稅駕每懷山水樂願得相從杖履間濯纓濯足隨清濁

梅花三公圖為龔紱朝美賦

何人善寫生下筆極精妙一枝早發擅魁名三鳥安棲
得公號點染雖人為活動等天造應知寓託有深意不

作織竒取時好之子嗜文學致澤期遠到一朝無心得
此畫無乃開先露機兆鼎鼐調和時冰霜歲寒操願言
有志事竟成吾輩宗盟幸輝耀

詠紙被

紙衾方幅六七尺厚軟輕溫膩而白霜天雪夜最相宜
不使寒侵獨眠客老夫得此良多年舊物實愛同青氈
不論素纈出南海豈羨文錦來西川受用將圖此生過
爭柰義孫要與阿翁相伴卧阿翁夜夜苦丁寧莫學惡

睡驕兒輕踏破

織機娘詩

織機娘織機娘豆花籬落風露涼
連宵織得幾疋布一疋不知多少長
豈知東家新婦性拙慢惟解貪眠飽
餐飯生憎爾曹唵嘍不肯休看渠晚
歲衣裳問誰辦

風狗行


風狗風狗名為獠舌吐涎流尾垂
曳狂奔迅走不知歸惡勢橫行無所
忌行人萬一為渠嚙失療死亡知必
至

鄉村城市一經過誰不丁寧戒迴避白日都忘戀主心
黑夜全無防盜意必當為人擊死棄中流帷蓋終無可
埋地

詠湯婆長句寄談勿菴勉之共發一笑

歲晚江鄉雪盈尺小齋不禁寒氣逼先生獨卧不成眠
兩脚渾如水中石今宵何幸得温温伸去縮來隨意得
非關被底別藏春深藉湯婆有餘力此婆生來名阿錫
紡織無能有潛德緘口何曾說是非謀身不解求衣食

寂寂無聲伴到明不作驕癡取憐惜君不見此婆有妹
名青奴骨格玲瓏如姊默不容暑氣侵肌膚亦與先生
舊相識只因寒暑不同時棄捨塵中倚空壁



野古集卷上

欽定四庫全書

集部
野古集卷中

詳校官國子監司業臣納麟寶

中書臣劉源溥覆勘

總校官編修臣王燕緒

校對官學正臣翁樹棠

謄錄監生臣文彩煊

欽定四庫全書

野古集卷中

七言古詩

甲戌鄉中民情長句寄彥文布政

景泰五年甲戌歲正當南畝耕耘際忽然驟水漲江湖
汹涌浩漫良可畏更堪滂沛雨兼旬大岸小塍俱決潰
田家男婦奔救忙力竭氣窮無術備沈竈產蛙雖古聞

今實見之非漫記東隣西舍咫尺間無舟不得相親慰
况逢缺食方阻饑女哭兒啼割心肺哀哉此情當告誰
上有青天下無地悲悽暗鳴無一言兩眼相看只垂淚
官倉儲積豈無粟有司吝出牢封記千年汲黯今無人
誰與皇家壯元氣縣宰懼難佯風顛飽食閉門經月睡
一朝謀定人不知半夜攜金遠逃避郡侯坐視付不知
但挾娼優日酣醉狗私掘去抵湖堰橫流自此無能制
甫差周倅問疾苦攫去白金如土塊府公唯責舊負逋

不問蒼生問魚膾按察徒懲小小疵曲徇鄉情舍姦弊
便宜太保幸見臨香火滿城人鼎沸羣姦媚事靡不為
溷浴都將布衣纒令行雖僅免輕徭薪米從茲價增倍
勸諭賑給浪得名偽錢糠粃成何濟雖擒妖人許道師
多少無辜枉遭累一夫一婦皆王民鼓弄如何等兒戲
昨來輕發激變語聞者至今猶戰悸功能人苟得專殺
法律底須存八議萬一有失忠義心宵旰深憂豈微細
乃知不學無術人隘陋終同斗筭器婁城老卒張文翔

不忍憐邪肆欺蔽片言出口禍即隨從此無人觸奸吏
只今所在皆凶荒未必不繇斯道致朝廷若不懲此曹
無日可回天地意嗚呼我民今年性命已難保明年豈
有全生計老夫殘喘不足惜橫死深哀後生輩昨夜虛
齋聽雨眠轉輾不能成一寐起來賦得民情詩惠政思
君錄相寄

右拙作奉寄彥文布政賢任相公庶幾得審鄉
曲真情非敢招人過也此輩無活人手段但有

殺人手段是詩萬勿示人毋使老拙復作張文
翔也然老拙餓死有日恐不久於世他日歸省
之餘幸致一樽酌我於溝壑中耳是年六月望
日因人便書此以告別

歸自雲間道經澱山湖與竹莊同賦

澱山水深清到底俯視魚蝦遊鏡裏老夫偶此棹孤舟
不是鴟夷載西子往還不覺數日留三泖九峰都遍遊
船中有酒有知己不醉忍使湖山羞與闌我欲婁城還

回首馬鞍金碧堆未知何年復到此重與湖山酬一盃
山亭鼓琴圖為顧宗術賦

嘈嘈市喧不到耳衮衮臺省那經心悠然獨坐草亭下
一曲為鼓瑤芳琴瑤芳琴傳太古不比近來新樂府子
期去後誰知音高山流水元無譜

丙子夏秋苦旱呈鄭明府

北山有雲不為雨南山有雷空作聲田疇龜裂稻苗死
農夫日夜形哀鳴前歲滔天遭大水去年疫癘人多死

甫能今歲可圖生旱魃為灾又如此嗟哉我民何罪愆
罹茲荼毒連三年老夫作詩問造物天乎天乎何以然

題葉義士討賊鷓鴣天詞後

為元叔季網維絕天狗下舐生人血草萊隨處起戈矛
人命輕如冶中雪姑蘇城東淞水南有魏佛廬名福嚴
中潛秃虺二三輩怒噓毒氣光炎炎時逢毅哉葉君子
不是世間文墨士智謀勇烈出萬夫竟取凶狂付殊死
一從歌罷鷓鴣天民方帖席得安眠至今聞者比昨日

毛髮如竹猶森然春去秋來百年久精爽不隨骸骨朽
玩寇高駢劉巨容地下相逢忸怩否繇來五世得賢孫
善保忠孝弘家門人見黃河浩浩入東海誰信發源萬

里來崑崙

五世孫與中
守獨石有聲

庚辰苦雨謠時五月至六月陰雨兼旬所在禾苗
浸沒殆盡憂民感時殊無好况不能措一辭以

寫悶六日僅得片時晴霽七日又雨為作此謠

重重疊疊陰雲痴疾風驟雨常淋漓橫流滴瀝晝夜響

不息大膝小岸日欲傾倒無能支為問天公如何不肯
暫時霽得非恠我噤口不作詩老夫今日作詩矣天公
自合生歡喜早賜陽光照四方丁寧農夫作急為我車
出田中水爛苗或有迴生理但得官租不負民不饑敢
惜妻孥飽糠粃

續賦苦雨謠

今日雷明日雷雷聲未絕雨即隨五月初旬作雨始六
月中旬猶未止田中水增五尺高南風吹作如山濤更

堪海潮挾湖水衝盡岸塍無可抵嘉禾萬頃爛根苗百
姓寸心如火燒晝夜踏車敢辭苦不憂播破牛皮鼓天
公倘有哀憐心太陽早賜驅羣陰不然我民必當死天
公惻隱何安此我今粗述民間風願達仁明太守公濟
時肯布萬全策我民感激情何窮

王君澤以白疊扇求詩

王郎手持白疊扇過我草堂求作歌作歌鄙俚豈足道
巴唱吳歛爭不多此扇骨格能抱節配以楮生如玉雪

卷舒自我付等閒用舍絲人不須說冬則守寒歸篋笥
夏則招涼解炎熱君不見齊紈出入君懷袖晚景可憐
中道絕我歌此扇止於斯莫羨團圓似秋月諸君諸君
聽我歌昔人解此唯東坡一朝飽喫惠州飯富貴一場
春夢婆

題山居讀書圖

寒泉古木山之隅塵土不到幽人廬清風一榻酒微醒
坦腹自讀羲皇書門徑蕭然寡輪鞅易安隱約柴桑居

平生心迹許誰共展圖令我思歸與君不見諸公衮衮
登雲衢車馬甲第爭紛如無勞肉食已自愧進退况復
懷次且又不見百年光景過隙駒邯鄲一夢俱成虛彼
常不足我有餘冥鴻高舉誰能拘

姑蘇夜泊

闔閭城西越溪北扁舟夜泊官亭側人家燈火亂明星
二鼓市諠猶未息衰翁轉輾不成眠歷想山川感今昔
賢愚成敗非一人後世徒能記遺迹城頭烏啼霜氣寒

江心水澄月色白沾衣幾許牛山情都付漁翁一聲笛
追賦陸烈婦歌

烈婦沈氏琴川人夫死自盡繇其家世貧賤無人
齒錄鄉人張有定為余言之故為賦此

陸家有子賤且貧一生家住琴川濱唯能擊鼓與吹笛
更無餘策堪資身其妻本是田家女目不知書心却古
蓬頭垢面破衣裳樂與夫君共甘苦夫君卧病忽經年
瓶無粒粟囊無錢晨昏何以給饘粥一飽十饑誠可憐

眼中骨肉猶行路况彼鄉鄰肯相顧徬徨悽楚只天知
嘿嘿更無人可訴一朝乞得斗升歸濟急庶以全燒眉
不道抵家日將暮夫命已逐殘雲飛躡地號天幾絕氣
祭畢隨將死相繼誰知村落婦人心有此堂堂真節義
老夫聞此十餘年每嘆丈夫多不如芳名未免久湮沒
春秋大筆何人書君不見豪兒剥民恣封殖輸穀公門
僅千石如何反得義民名華表旌門炫金壁

時入粟得
名義民旌

表

為周德元題陳如隱畫梅

若人情氣蟠胸次素與梅花共心事苟托松滋與管城
寫出孤山早春意不知前代有華光自許今人無第二
千花萬藥信心手妙處不緣香色泥君不見逋仙宅畔
一枝開雪凜風寒見高致誰知清曉角一聲已醞商家
鼎中味

題印上人所藏趙子昂楊廉夫二公墨蹟卷

馬鞍之山殊峭拔秀麗蒼然壓吳浙暮靄朝嵐聳畫屏

古檜長松挺高節豈無超然出塵土託跡幽深守孤潔
林泉賴此增光輝不負清風與明月吁嗟世變罹兵戈
一時盛事隨消歇蒿萊滿眼鎖寒烟牛羊就牧狐狸穴
見山有院人不知一記惟存趙松雪孟張屬和久寂寥
膾炙幸聞仙伯鐵二公自是文場豪墨妙詞鋒總竒絕
月潭何處得此卷寶愛深逾古環玦老夫為爾賦長歌
待補山中名勝缺只疑二老冥冥中撫掌相看笑粗拙

秃奴詩戲寄沈誠學

東村二八張小姑髻髮油油如漆烏朝朝不惜五更起
對鏡千梳并萬梳爭似吾家阿奴禿落落數竿刪後竹
一生不費膏沐資日出酣紅睡方熟君家有婢亦如此
何幸少年猶有齒夜寒聊取代湯婆殊勝當年玉川子

題阿翌寫墨梅

翌生寫梅不寫迹不用臙脂唯用墨乃知鐵石歲寒心
粧點何須事顏色君不見牝牡驪黃付等閒無鹽應笑
西施白

梅花莊詩為朱明仲賦

先生卜築吳城曲，賸種梅花繞吟屋。自期歲晚供詩料，豈慕平泉與金谷。花開時節天正寒，雪花亂灑迷林壑。杖藜引鶴飽幽翫，不與梨雲同夢看。歸來袖手寒窓坐，石鼎有茶爐有火。神交不覺兩忘情，誰是梅花誰是我。

自述和沈誠學壯遊詩意

先生卜築江之皋，屋廬歲久渾無茅。薄田數畝書一束，耕耘誦讀忘疲勞。旁人笑我謀生拙，不道胸中蘊奇絕。

幾多明月與清風一一難將向渠說
年去年來春復秋
隨宜無喜亦無憂
眼中富貴等螻蟻
一點不使靈臺留
風雪行看歲寒至
破褐從教露雙髀
待得春來生意迴
還我一身和暖氣

為彥中題畫

青山之青如佛頭
白雲化作寒泉流
世間塵土飛不到
眼中景物俱清幽
若人自是好靜者
豈非五柳先生儔
每托琴書寫高興
脫屣樂從魚鳥遊
却笑時人苦不達

但知聲利孜孜求無異貪程夜行客漏盡鳴鐘猶未休
君不見小虞塘西玉峰下一菴已遂吾菟裘共論心事
肯相過斗酒當為山妻謀

採桑曲

桑柘雨晴如綠雲誰家女兒茜紅裙採桑纖纖露玉笋
低首不肯觀使君採之採之弗容緩爭柰筐深未能滿
只愁歸晚正蠶饑不道使君欲腸斷

偶題逸老菴

居臨流水縈紆門對青山突兀四時風月雲烟總是吾
家舊物但知安分休休不作書空咄咄且喜盈樽有酒
何羨滿床堆笏君不見朝來簷日暖融融笑看梅花坐
捫虱

題王樸菴隱居圖

王君隱居臨漆浦物雅風淳真樂土杖履時來看故人
滄浪日聽歌漁父盡力耕桑事衣食飽閱詩書驗今古
老夫平日荷知己放棹頻過竹梅所

王氏
軒名

琴樽動輒數

日留忘却人間有官府憶昨別君滄浪邊東西魂夢勞
相牽時馳歲去已堪惜物在人亡猶可憐賢郎孝友出
天性對此遺澤號蒼天點隨淚落樹梢雨聲助嗚咽山
中泉我今看畫題一篇含愁閣筆增悽然無繇得與同
遊賞鶴歸華表知何年

樸菴昔以此畫求詩留余室久矣不幸而卒聊賦此寓哀悼云

續鐵心行

男兒心腸硬如鐵婦人讒言如火烈置之壚冶鼓風掬
須臾硬鐵柔如線長鍼持出砧砧上火星四出誰能向

一椎重兮一椎輕
聲聞遠近錚錚鳴
椎後復燒燒復椎
或鋤或鑿隨手成
乃知男兒有慾心
易軟豈能不惑常
保骨肉之深情我願
丈夫心如金莫如鐵
一迴鍛鍊一迴堅
彼火灰寒自當滅

寓意

天上雙星有常處
夫為牛郎婦為女
東西相望自年年
只隔天津一泓許
耕田匪易織亦勞
不得從容相慰語
傷心一掬淚如珠
灑向人間作秋雨

竹枝歌

朝見浮雲飛出山暮見浮雲飛入山
浮雲自是無心物
郎既有心胡不還

題雙松圖

豫章榎楠中梁欂未免匠石斤斧尋
嶧陽桐梓作琴瑟
塵匣空恨無知音何如君家兩松樹
飽含風露垂清陰
輪囷雖不獲世用老氣自足雄山林
長空六月灑蒼雪
清絕不受塵埃侵夜來月出東山岑
影落萬丈寒潭深

道人醉發長嘯直疑驚起雙龍吟

五言律詩

客中秋夜

仲秋纔十日此夜已三更
蕉葉兼梧葉風聲雜雨聲
故園初斷夢逆旅未歸情
無那庭堦下蛩音響到明

寄陳存誠

南野先翁業東臯素隱亭玉森
三逕竹翠展一池萍水接清源
活山隣古洞靈舊遊憐別久
深荷眼終青

碧蘚常封逕紅塵不到門處卑謙德厚用拙道心存制
作追前古窮探到本源每思燈火夜時得耳高論

民風

潮挾兼旬雨登時水橫流鯉從床下躍鷗向枕前浮措
手知無地將何望有秋野翁如杜老日夜為民憂

題西疇草堂

閒人無俗事幽境有清娛樂與禽魚共情隨草木俱琴
樽花外席茶筍竹間厨世路輕肥客相逢莫問渠

七言律詩

吳淞漁隱為陸大用賦

吏人家住吳淞上不着羊裘只着蓑紅蓼白蘋隨處泊
清風明月任情歌鬱林有石家聲舊甫里無官野興多
昨夜秋風吹客夢問君鱸膾味如何

新秋

夜來絡緯知秋早一片新聲出槿籬鱸膾夢迴無限興
羅紈題就不勝悲思親腸斷雲飛處憶友心推月落時

無柰江山苦留客故園歸計尚遲遲

漫興

辛苦寒窓理舊編不知黑髮變華顛壯心日就如灰冷
瘦骨年來似石堅詩句偶成還自和酒杯得趣與誰傳
功名事業君休問都付青春美少年

秋興二首

井上梧飄一葉秋天邊復見火西流炎威乍熄人皆喜
寒氣方來我獨憂及早好修江上屋趁時宜補篋中裘

却憐兒輩踈狂甚攜酒方登賞月樓

眼底年華次第過此身未老鬢先皤形容憔悴已如此
事業蹉跎將柰何德薄敢辭知己少患深轉覺一身多
秋風忽起江東興謾託尊鱸發浩歌

和唐陸龜蒙鵝鵲詩

自是禽中隱逸流雕籠寧似舊汀洲菰蒲夢憶雙飛曉
雲水愁憐一望秋素質豈招今日累文章翻致此身讐
他時倘獲山淵惠好學高飛海上鷗

訪倪道士不遇因寄以詩

芒屨竹杖皂綸巾
來覓烟霞洞裏人
何處去尋騎鶴侶
山陰負此好鶯賓
風飄桂子香逾遠
雨洗苔花色轉新
為寄短歌申後約
不妨多釀甕頭春

季仲怡江上閒居

白沙翠竹淨無塵
歲晚棲遲寂寞濱
小艇繫門輕似葉
鮮鱗出水白如銀
兒童笑語能留客
鷗鷺分飛不避人
我亦未除山水癖
載書願結米家隣

漫興

草座麻衣首宿盤雖貧未足害清歡
堦前嫩草抽書帶
溪上新篁長釣竿陶亮日從親
舊樂龐公獨遺子孫安
閉門著得書盈篋未許旁人得借看

竹林深處為九我賦

知君素抱歲寒心晚結茅茨向竹林
書幌色侵蒼靄重
釣船陰鎖綠雲深溪山李白三杯酒
風月嵇康一曲琴
自欲杖藜時直造囊中恨乏買隣金

卷中
九我欲買山結室以贈賦詩却之

問山屹立幾何年
閱歷應從太古前
巖穴晦明遲旦暮
松蘿濃淡任雲烟
昨看猿鳥迎新客
今見狐狸卧舊阡
自信命非金石固
不勞重費戴符錢

述懷一首

自嘆微軀一羽輕
去留無定似遊僧
病隨春草年年長
愁逐秋潮夜夜增
定省久違思老母
心胸日塞念良朋
何時得泛歸吳棹
重讀父書親夜燈

丙申九月十六夜寓琴川客館夢亡徐氏女兄

月冷霜悽夜未終
偶然相見夢魂中
從容尚說平生話
清瘦還如舊日容
生死固知難再會
幽明何幸得重逢
覺來無語空垂淚
恨煞穿雲曉寺鐘

張觀復先生哀輓二首

昔年幸獲叨文會
今日那知死別離
我輩正懷瞻北斗
先生何忽跨南箕
濟人誰施囊中藥
傳世空遺篋裏詩
道路行人盡流涕
况予深荷叔牙知

先生德業超流俗遠近咸推君子儒蜀郡未消司馬渴
彭城已發范增疽雖無好爵書華表却有芳名照海隅
今日九泉歸葬處澗聲嗚咽助欵欵

寄俞處士

湖海歸來味道腴甘心寂寞卧衡廬玉堂金馬無新夢
竹几芸窓有舊書方寸淨圓秋月似一身閒逸野鷗如
歲寒老我思三益正恨離羣久索居

寄寫竹金端石

湖海聞名已有年，欲求識面苦無緣。
每於筆底觀秋意，已信胸中有渭川。
萬籟起雷思老可，一枝垂露想坡仙。
草堂久矣無顏色，願乞飄蕭數葉烟。

雜興

歲晚歸耕學老農，無拘無束甚從容。
詩朋酒侶時時會，牧豎漁郎處處逢。
風月每酣清晝夢，塵埃不浣綠苔封。
有時醉顧山妻笑，我欲唱歌卿和儂。

送羅孟維歸越中兼柬陳正菴

論心未盡又分襟，唱徹離歌酒漫斟。
杖履數陪尋往蹟，鄉關無那促歸心。
楓林晚映烟光薄，江水秋涵鴈影深。
他日相思隔吳越，便風須寄短長吟。

夜宿淮雲寺二首似用上人

朝來玉阜向芝川，暮轉婁城百里懸。
僮識我心寧悼苦，馬知人意不須鞭。
青青隴麥迷殘照，靄靄江村鎖夕烟。
甫到淮雲星月爛，扣門驚破老僧禪。

偶來借榻淮雲寺，愛爾禪房事事清。
烟穗繞屏香漸爇，

雪花浮鼎茗新烹
蘿窓有月還生白
簷鐸無風或自鳴
他日遠尋蓮社約
也須沽酒慰淵明

秋日苦雨

九日江皋秋向深
農家刈獲苦多陰
誰知此日祈晴意
即是前時得雨心
野鳥正呼泥滑滑
途人方嘆水涔涔
何當盡掃頑雲翳
獨使陽烏普照臨

詠松

亭亭獨立秀穹林
得地何愁枳棘侵
老節定經千歲久

直根應透九原深塵埃不染憐渠貌風雪難移信此心
却怪祖龍封爵汙不平時作怒濤音

農樂軒為陸安道賦

耕耘雖苦非為苦貧賤堪憂未足憂老婦一生甘食藿
稚孫十歲解騎牛官租已畢知無事鄰社相邀慶有秋
絕勝眼中金與紫施施難免乞墻羞

趙氏雙桂軒

趙公二子美無度雙桂名軒擬弟兄已信結根同得地

更憐交葉總含清肯隨桃李爭顏色要與松篁一性情
笑煞田家紫荆樹却從憔悴復重榮

寄懷袁兄

雙丸遞走疾如梭老色駸駸可奈何白髮盡從愁裡得
青春都向客中過壯懷久息營為懶往事難忘感慨多
珍重故人知我意停雲回首付悲歌

郭公輔輓詩

古婁樽酒憶相違瞬息那知往事非生死可憐容易別

交遊轉覺老成稀
謫仙此日騎鯨去
丁令何年化鶴歸
老眼一泓懷舊淚
隨風散作雨霏霏

和寓菴登山韻

情親酒旨復餽佳
又煮蒙山石上茶
黃菊騰開如有意
青山無價似容賒
狂歌感舊聲逾激
醉筆題詩字半斜
歸卧草堂成一覺
已無魂夢到京華

遊南園

最愛南園風致好
不妨日造兩三回
漫燒玉版供茶椀

旋網銀梭薦酒杯清興豈因春去減新詩不待雨來催
自憐南北東西客可得長叨杖屨陪

宿姑蘇半塘寺贈覺師

平生不到半塘寺今夕方來借榻眠水綠山青塵外境
風清月白雨餘天穹碑三復知前事廢業重興憶老禪
珍重覺師能繼武不教松檜減雲烟

和張文翔在獨石見寄

文翔諱翼太倉人
時為言事被謫

長思遠道正綿綿南北睽離思慘然明月照人千里共

自
卷中
愁雲迷目萬山連恨孤慈母衡門倚痛念難兄白日眠
我亦為君知所戒唯憑一嘿免招愆

送張先生辭順德館西還

春雪初消柳尚疎行人揮涕問前途忘憂已謝霜餘草
返哺空歸月下烏歲月無情雙鬢老乾坤有恨寸心孤
交情付與湄溪水相送歸舟過尚湖

歸自琴川春暮偶成

一身南北勞奔走不覺眼中三月殘水流花去送春色

風挾雨來生晚寒
缺食小民方困苦
憂時野老正辛酸
聊成短述歌時事
或備風謠得採觀

移家小虞浦上二首

清風明月小虞濱
鶴髮蕭蕭一老身
自信胸中無一事
得居林下作閒人
無錢無粟未妨樂
有酒有書誰道貧
滿野閒花并野草
無非都是自家春

歲晚移家寂寞濱
茅菴一箇僅容身
昔為風月舊交友
今作溪山新主人
白髮被肩渾忘老
清霜到骨不知貧

年來學得邵康節拍拍滿懷都是春

陳氏印溪書堂

時琴川陳公範為師甚方正博文

印溪源委遠而深溪上書堂隱竹林日究周情并孔思
時鳴點瑟與回琴千之自得為師道申國能全愛子心
舉世不知慈大小惟圖厚積滿籬金

寄張文翔

一自婁城別醉顛嫦娥不記幾回圓放舟久負青童

嘉定

地名約對鏡空悲白髮年既賀晚成揚子宅不圖先著祖

生鞭肯來逸老菴中話當問髯狂謂誠學借酒錢

夜歸東莊

夜來覓棹返東莊遙望東莊道路長書畫滿船風與月
薰葭兩岸露為霜荒雞遠唱如人哭潮水東歸似客忙
更念田家勤苦甚晨炊燈火已煌煌

歸自海上

久別故人邀酌杯趁潮遙自海濱迴風吹蘆葉響如雨
浪打船頭聲似雷友病尚淹勞夢想詩成未穩費敲推

候門推子正相望極目馬鞍金碧堆

甲戌民風近體寄葉給事八首

疫癘饑荒相繼作鄉民千萬死無辜浮屍暴骨處處有

束薪斗粟家家無只緣後政異前政

時改周
公法

致得今吳

非昔吳寄語長民當自責莫將天數厚相誣

昨過任溪南北村百家能得幾家存春秋旦暮常愁餓
父母妻孥半病瘟荇粉磨成連濁土榆皮剝盡到深根
相逢無復人形狀兩頰何曾斷淚痕

釜可生魚甌有塵此言今日始知真極貧只為無恒業
大患皆因為有身顧義恥隨偷作伴惜名樂與死為隣
西風昨夜催寒信凍殺街頭多少人

賦得田家苦楚吟一番歌詠一傷心妻孥命賤等黃土
薪米價高同白金四隅常有盜賊警百里寂無雞犬音
相逢父老聚頭哭淚滴洪波到底深

自憐鬚鬢白如銀不道今年遇此迍數畝薄田俱付水
百般老病盡隨身念渠漂泊無家者與我同為失所民

終夜憂吟聲不絕半因憂己半憂人

一經水旱便流離風景蕭條思慘悽到處喚春空有鳥
連村報曉寂無鷄頽垣廢井荒蕪宅垢面蓬頭瘦損妻
更有社公同寂寞年來不復享豚蹄

驟雨狂風日夕并海濤奔湧勢如城一朝稻付深淵沒
不復人從大道行官府乏儲難畫策田家無計可求生
老夫亦是溝中瘠莫怪歌聲似哭聲

田疇不見見江湖烟火人家大半無薄熟豈能周晚歲

實徵安得副官租多冠素解矜民瘼奏牘終能達帝都
昨日喜聞停免政不憂鞭撻爛皮膚

千墩夜泊上鄭明府

扁舟夜泊千墩浦耳內都無鷄犬聲到處試從村老問
無人不頌宰官清一年秋賦相將畢兩月春田次第畊
惻隱願加時賑給莫勞安撫問民情

陳安止孟東輓詩

幸接芳隣竝早孤如魚同隊長東吳余豈遠作逋逃客

公已高登貴顯途故里菊松三逕在歸舟囊索一錢無
澄思七十年前舊淚眼何曾為老枯

送郁老友歸芝塘

細雨弄晴三月天故人辭我歸芝川
墻頭燕子語留客
溪上柳花飛撲船小姬拍案調新曲
野老揮毫書大篇
沈誠學
有最序最是落紅如惜別隨風
點點墮樽前

春江別意圖送友人

江上春風拂柳絲畫船過鼓送君時
壯行賴有詩盈軸

拚醉何辭酒滿卮。風月自今勞。遠夢溪山，從此起遐思。
交情別意知多少，惟有青山，賸得知。

過虞家宅

廿載流光快擲梭。虞卿宅畔重經過。白頭野老都成鬼，
紅粉村娃總作婆。官賦孰如今日重，人家不似舊時多。
夕陽野草花橋路，不覺徘徊發浩歌。

送王公亮之桂林

春雨初晴春日暄。行人話別水西軒。一壺易盡辭吳酒，

萬里難留適越轅壯志豈愁南海障寸心惟念北堂萱
客中情緒多傷感莫向瀟湘夜聽猿

寄淮安杜可久可平兄弟

顧我容顏今老大憶君兄弟更辛酸別來十載又廿載
歷盡千難與萬難舟楫幾遭風浪險竹松多受雪霜寒
武陵橋上今宵月千里相思不忍看

題東峰菴為王庭美賦

東峰境界無塵土華扁未寒前日盟茶話偶來留坐久

功名頓覺等閒輕
春風秋月

馬鞍山東
西二亭名

副吟賞夜鶴曉

猿無怨聲主人焚香讀經
罷多少青蓮南海情

自况

短髮被肩霜雪如怡然自樂
易安居不圖時譽貧辭富

豈謂來生老讀書

嘗見一老人年九十手不釋
卷人問之曰讀來生書耳

無愧自

然成快活多財未必見贏餘
眼中役役蝸蠅輩過眼浮
華總是虛

送陳說菴先生歸尚湖舊隱

攜取舊書歸舊隱，匆匆惜別意如何。
自憐野老愚蒙甚，每荷先生啟益多。
客夢遠懸親塚樹，鄉心長憶尚湖波。
自今良會知何日，翹首虞山付短歌。

過任陽有感

任水灣灣南北流，人家多住竹林幽。
舊堤不見尋梅舫，遺趾空聞夢鶴樓。
漠漠草萊將薄暮，離離禾黍已深秋。
可憐當日歡娛地，不道今成滿目愁。

前此承與中約，同諸士友登玉峰，弔祭宋先賢衛。

文節公祠有感

衛公名德久傳芳
祠宇荒涼付夕陽
地絕掃除多積蘚
逕通樵牧半無牆
不緣著績薰穹壤
安得懷賢奠酒漿
流俗但能知諂媚
強將夫婦塑城隍

寄淮安陸仲孚

康王宅畔舊比隣
樽酒相違二十春
俗態已翻千百樣
故交今失幾多人
一般有累丹心苦
聞是無兒白髮新
若遇便風如見憶
鯉書無惜寄歸頻

送陸德深歸河陽

江上一壺新熟酒
擔頭數卷聖賢書
也知無計留歸棹
未卜何時過草廬
子弟匆匆方惜別
烟波渺渺正愁予
到家暇日遙相憶
尚為先生候鯉魚

別沈克懋

十載西齋瞬息過
不堪雙鬢已成皤
每驚春鴈添歸興
常見秋風發棹歌
久客何君知我厚
暫違憐我望君多
匆匆莫訝輕分手
爭柰婁雲入夢何

別俞景明

多君積學富才賢文采風流屬少年
拙句每成勞屬和苦心無訴賴相憐
離樽忍醉江頭酒別鶴愁聞月下絃
歲晚有情如見憶雪中當泛子猷船

和屈季恒寫懷韻因以餞之

季恒詩云青雲望斷哭途窮
白首從戎碧海東
詩酒盟寒嗟會少
田廬業廢嘆囊空
虛名徒爾為身累
往事真成與夢同
後夜相思在何處
海

天明月照孤蓬其兄孟東和云念汝親情豈有
窮那堪遙隔海西東致身雲路知無分寄迹窠
巢嘆一空花萼庭前徒自好琴樽客裡與誰同
愁來不覺垂雙淚長向鴿原望轉蓬友人袁宗
魯和云丈夫雖困豈終窮天使丁寬載易東義
重念遺鄉國遠理明心豁海天空琴書此日分
攜去詩酒何年復與同他日老子思誨益烟波
渺渺望歸蓬

四十餘年吾道窮一身南北又西東家山杳杳徒勞夢
事業茫茫總付空自謂此情唯吾有豈知今日與君同
題詩不盡相思意目送悠悠泛海蓬

和安止歸田

相逢莫嘆二毛侵共喜羈禽返故林因與對床談往事
不知擊節起長吟簪纓已果平生願桑梓今全夙昔心
好約明春真率會看花酌酒更彈琴

吳塘夜泊懷屈季恒

孤舟夜泊吳塘渡兩岸秋風響荻花寧海驛潮開畫舫
古婁城戍咽悲笳雨聲一夜不離枕客慮萬條都在家
甫睡又成懷友夢遠隨征鴈過南沙

晚自崑城歸北郊別墅

獨步出城光景暮村居處處起炊烟團圓未見月離海
歷落已看星在天別墅牛羊歸逐逐遠汀鳧下翩翩
茅茨一點青燈在知是老妻猶未眠

和安止秋日見尋

匆匆歲月去如流又見涼風起荻洲眼底故人年未暮
就中唯我鬢先秋壺觴漫託者英會山水寧辭爛漫遊
聞道北莊饒勝槩宦情得似野情否

送袁兄宗魯入京

少小論交至老成悲歡離合幾闕情桑榆正擬同幽賞
書劔那知復此行膝下苦違頭白母囊中况乏孔方兄
孤鷺別鶴愁無限謾託瑤琴訴月明

苦旱

狂風日烈迷塵道不奈為災旱魃何病草渴心思化雨
涸鱗翹首望恩波湫潭靈物空為禱田野農夫彊作歌
若箇解伸探月手煩君為我挽銀河

題金崑居為陳羽伯畫竹居圖次張觀復先生韻
明月清風境界寬不裁凡卉只琅玕庭除賸有三湘意
枕簟能無六月寒時見啄苔來縞鶴每驚拂石舞青鸞
故人詩畫俱清絕可得頻過一借看

閒居即事

幽居景物自清妍
入眼經心事事便
暑氣漸消秋近候
涼風欲動雨餘天
庭除千葉舒紅槿
盆盎雙頭吐白蓮
更有芭蕉尤可愛
最宜濡墨寫長篇

與袁葛二兄泛舟至婁東

風滿孤篷雨灑窓
故人同載下婁江
綠疇南北連千畝
白鳥高低去一雙
濁酒任斟那計數
野歌隨意不論腔
紀行豈是無新作
正愧曹鄴淺陋邦

漫成

遠慕淵明自把鋤從渠兒輩笑迂夫生憐花鳥如兒女
酷愛溪山似畫圖不飲幸然無酒債好吟長自負詩逋
年來尚覺疎狂在折簡應知未易呼


侯門深鎖曳長裾相府尤慚進謁書破甕有齏聊當肉
直鈎無餌豈圖魚清風皓月終歸我紫綬金章總付渠
謾喜工師求大木不曾回顧道旁樗

自愛閒居雅趣多不容塵土浣松蘿幽深彷彿元公洞
安樂依稀邵子窩或武或文燒藥火非商非徵採樵歌

年來久息趣炎夢冷笑飄飄赴燭蛾

田家苦楚吟 已未秋作

極目滔滔水橫流不分高壟及低疇
往來客子嗟無路刈獲農夫恨乏舟
爨下鯉魚聞撥刺枕邊鷗鷺見沈浮
官家不信民風苦方擬騰書賀有秋



野古集卷中